

## Wasse Hitz

Vor e paar Daach hawwe merr beim Schorsch owends uff de Terrass gesotze unn hawwe Äbbelwoi gedrunke. Unserne Mädcher isses ferr drauße ze warm gewese unn desdeweese hawwese in de Wohnstubb gehoggd, hadde enn Ventilator brumme unn hawwe sich irschend su e Fernsehsendung iwwers Koche oogeguggd.

Mir Männer hadde koo groß Lust gehabbd ze babbele, weils oofach ze warm gewese iss, also hawwe merr die meist Zeit in die Beem im Schorsch soim Gadde geguggd, wie dene ihr Blädder e bissi gewaggeld hawwe. Awwer merr kann joo nitt allsfort doo sitze unn nix redde, doo hott de Schorsch oogefonge: Merr kennt sich iwwer alles uffreesche. Iwwer was donn?, habb isch gefroochd.

Iwwer alles, seet de Schorsch.

Donn iss e Daub kumme, hott sich uff oon vunn dene Beem owwe uffen Zweisch gesetzt unn hott geruucksert.

Seet de Karl: Merr kennt sich werklisch uffreesche.

Du aach?, habb isch gefroochd, iwwer was donn?

Iwwer alles, seet de Karl, aach iwwer dess Ruucksern vunn dere Daub.

De Schorsch iss uffgestonne, hott e paar Schritt uff den Boom medde Daub zu gemacht unn hott in die Händ geklatscht, awwer die Daub hott nor meddem schiebe Kobb erunnergeguggd unn hott donn widder oogefonge ze ruucksern.

Wasse Hitz, hott uff oomol de Karl gesaad, awwer dess iss joo nitt dess Schlimmsde.

Was issen dess Schlimmsde?, hott de Schorsch de Karl gefroochd.

Die Trockenheit, seet de Karl, iwwerall isses trocke.

Ja, saach isch, die Trockenheit iss dess Schlimmsde. Hosde noch Äbbelwoi, Schorsch?

De Schorsch hott nix gesaad, hott die leere Äbbelwoiflasche genumme, iss in sein Keller, hott zwaa neie ebeigebrochd, hott unser Gläser widder vollgemacht unn mir drei hawwe donn jeder enn große Schluck genumme.

De Karl seet: Prost, ihr Männer. Ja, die Trockenheit iss dess Schlimmsde. Die gonse Äbbel dun vertrockene unn falle vunn de Beem.

Doo werdd nächstjohr de Äbbelwoi deirer, seet de Schorsch, no ja, donn drinke merr halt Wasser.

Wo willsden dess Wasser her hawwe, Schorsch?, saach isch, de Edersee iss schunn leer unn de Rhoi hott aach nimmi vill Briehe.

Merr kennt sich werklisch uffreesche iwwer dess meddem Wasser, seet de Schorsch.

Was issen jetzt?, frächt uff oomol de Karl.

Was sollen soi?, frächt de Schorsch.

Die Daub ruucksert nimmi, die iss fortgefloh, seet de Karl.

Isch saach: Iwwer die brauchstde dich halt nimmi uffzereesche. Dess werdd dere langsam ze dunkel, die will hoom in ihr Nest.

Dess will isch aach, seet de Karl unn iss uffgestonne.

Aach de Schorsch unn isch sinn uffgestonne, unn doo sinn aach schunn die Mädcher aus de Stubb kumme unn dess Kättche hott gefroochd: Seider mied, ihr Männer, habbderr eich gut unnerhalle?

Ja, seet de Schorsch, unn mir hawwe uns aach iwwerhaupt nitt uffgereeschd, odder?

Naa, hawwe de Karl unn isch ze Antwort gewwe, warum donn aach?

Eiern Honnes